

四庫全書

集部

欽定四庫全書

文忠集卷七十八

平園續稿三十八

宋 周必大 撰

墓碣二

冲虛居士錢君

朝彥

墓碣

嘉泰元年

三代盛時四民有常職農服田工商宿業惟士最貴世  
祿為胄子賓興為賢能不以外物而遷故能各抵於成  
勃興驟廢者鮮自井田壞四業俱失農興工商既散而

逐末貴族降在皂隸秀民不復鄉舉人才無所於歸或橫議如孟子所云或潛山隱市如杜牧所論於是處士之名著焉在戰國時高者取卿相下不失尊禮至於漢唐有公車待詔有藩鎮之辟召得人與否班班可考今朝數路取人惟恐遺賢其間懷才抱藝之士門蔭科舉所不逮者尚或有之上方一道德以同風俗特命起家絕無僅有下亦各安分義不求聞達然降才于天積善在躬源深流遠終裕乃後肆其子孫修身勵業自足進

為於世而天復有以相之凡今顯者多出於此永嘉錢氏其一也初獻王奉兩浙地圖歸聖朝後裔散居四方諸孫有諱輯者嘗為韶州刺史輯生尚端州司理叅軍游温州樂清愛白石風土家焉尚生浩浩生潔潔生二子忠卿字某堯卿字熙載世以文字稱紹興十四年詔舉孝廉州縣以熙載應選未報而沒忠卿生一子諱朝彥字用明謙退和易少從孝廉學周官業成身隱每出未嘗乘車或勉之過市即下曰吾不仕不宜坐人上家貧

不能周急力可及亦弗靳遇樵夫野叟無高下迭為賓  
主鄉人莫不敬愛晚喜道家說自號冲虛居士白石有  
岩岩有集真觀高出羣山之表歲從黃冠避暑酒酣相  
興浩歌起舞吹洞簫人望之疑以為仙素善章少房少  
房死過其墓必酌漿酌之與人交類此雖督諸子以學  
每曰教之在我其成有命作詩不能工而語有塵外趣  
名卿太子詹事王十朋稱其不羨不矜心休休然鄉人  
以為知言卒年七十七有冲虛集二十卷夫人同郡孫

氏贈承事郎士初之孫奉議郎知紹興府嵯縣潮之女  
四歲知書父授以孝經論語歸居士時祖姑鮑姑賈皆  
在堂羣從聚居婦道孔艱夫人早暮躬盥饋接姻戚約  
已裕人內外稱善姑末疾累載奉事無少懈其沒也哀  
慕三年如一日以乾道庚寅十月辛亥終於家年六十  
三年十一月丙申葬縣之茗興鄉白石南山之原後  
十年當淳熙庚子七月丁丑而居士沒是歲十月己酉  
乃合葬焉

元文孫夫人葬地如上既曰合葬而居士却云白石之所塘阡未詳

四子宿賓

寬宏女適陳濤孫正之松之釋之宏字文子後以字為  
名通經術工詞章補為國學上舍釋褐初仕吉州軍事判  
官今以宣義郎知潭州醴陵縣格當官成均屢求予碣  
其先墓於是宿賓寬俱死矣按孝廉有子曰朝佐朝佐  
生易直試南省第一今為太學錄文子從弟也錢氏其  
昌乎故為推原古誼振宣幽光而繫以銘曰

志氣內充樂無窮德善久積吉有終根本固者枝葉穠  
苗畲勤哉黍稷豐報世在天理可通富貴豈必於其躬

松檟鬱然馬鬣封里人過之常敬恭

朝奉郎李君

琥

墓碣

嘉泰元年

予自少喜從前賢子孫游非獨典刑可想亦以其議論傳世足以發蔽蒙而資寡陋也往時李君西美來監吉之稅務氣宇軒昂論事風生所居官號卑冗日與賈客販夫較量錙銖州家督迫于上胥徒漁獵于下他人窮日之力捄過不暇君獨知所取舍商旅爭出於塗歲課日增觴詠從容如治閑曹家多古帖名畫客至時出示



之聞人有善稱揚不已遇有過失輒面折使歸之正以  
是人皆敬愛予益信故家流風果不同也自是各官游  
或合離殆三十年而君即世既葬其子師祖以故人修  
職郎監南岳廟王游狀來請銘予方直禁林諾之而未  
暇今又將三十年其子及遊死亦久矣君之孫咎持予  
舊書督踐言予愧嘆不已乃為之書初唐先主李昇先  
中主璟弟珉封齊王開寶末後主煜入朝國除珉徙家  
淮西有子曰鐸字用章四子李仲宣隨其兄宰舒城就

買田地遂為廬江人仲宣生執中執中生虛一即君曾  
祖也嘗應制科終大理寺丞贈左朝議大夫祖諱公麟  
字伯時元佑名士終左朝奉贈朝散大夫父諱闕碩朝  
奉郎湖南提舉常平贈右中奉大夫母令人趙氏君諱  
琥西美其字幼傳家學宣和七年父致仕補將仕郎建  
炎三年授右迪功郎虔州虔化尉未上辟舒州桐城縣  
主簿外艱去紹興初江西闕李回辟臨江軍新喻尉盜  
蜂起君以捕治賞循右修職郎尋監中嶽廟十一年實

為稅官有美政循右從事郎永新繁劇難治監司選君  
攝令遊刃恢然方上辟書會稅官秩滿遂詹吉州十八  
年調興國軍判官薦員益格二十二年改右宣教郎知江  
州瑞昌縣邑大事叢君決遣如流庭無留訟歲籍祭課濟  
州用而私商擅其利峻法不能禁君區處有方犯者有絕  
訪唐元結廢祠新之二十六年代還民造巨艦以送踰境  
即謝遣民歸之縣為官舟識君廉節轉右通直郎賜服緋  
銀二十九年僉書清海軍節度判官廳公事假守惠州闕

半年而治郊聞諸臺聚番禺君悉心營職闕吏忌其正將

滿會易帥漕乘間

闕

君以事君避衆怨引疾去士庶餞送

填道至南海神廟下萬目睽睽君瀝酒禱曰我若營私舉

家當淪深淵不然誣我者神其捨諸登舟便飄轉久之誣

君者皆有故三十年轉右奉議郎孝宗登極遷右承議郎

再為昭信軍籤判乾道二年轉右朝奉郎贛經齊述亂人

心易搖一日訛言紛紛民爭徙避官吏亦具舟於岸君走

諸營呼某長諭以毋然皆曰不敢已而遂定後其守臣吳

南老陞辭上曰聞贛嘗洵微幕中有人不挺亂乎南老  
下車首及之且曰當時恨未知君姓名終更通判邵州未  
幾以風痺求主管台州崇道觀歸治書室營小圃日引孫  
曾燕適其中遂致官政自號知足老人淳熙元年十一月  
壬子終於正寢享年七十七明年十一月辛酉葬廬陵縣  
膏澤鄉龍須山北岡之原兩娶趙氏及張氏鄒氏皆安人  
二男長師祖迪功郎丞正連州司法叅軍次晞祖今俱亡  
三女歸登仕郎張可大進士饒大夫承信郎胡元齡孫男

四人長咎也見謂克家卓早世次申準女四人長適鄉  
貢進士文元鼎次適劉仁季王棟葛延譽曾孫男三人  
仲舒溫蒼業儒女三人長適方輝二未行元孫四男一  
女俱幼君性孝友兵火中負母骸南渡北溪於此愛二  
弟珪琮未嘗相捨教育其男女為畢婚嫁家無餘財而  
樂周急平昔不以秋毫干州縣介然而居殆天性也銘  
曰

世闕之光風力之強議論之剛人或得一君兼長誰之

不如外潛郎才大用小名弗彰念昔不及銘其歲刻文  
宰上傳無疆

通判舒州沈君煥墓碣嘉泰三年

紹熙三年四月戊寅沈君叔晦卒十二月丁酉葬慶元  
府鄞縣翔鳳鄉家坎山龍尾之原凡四方知名士皆來  
弔祭而全州守闕簡太學正袁燮有諷鄉評誌礦狀行  
實授其子來請銘追思立朝不能推賢揚善予愧叔晦  
益者三友叔晦不予愧也銘可已乎按沈氏世家定海縣

已而徙鄞曾祖開祖子霖經明行修主惠州博羅縣簿  
父銖力以道義教諸子終承務郎籤書鎮東軍節度判  
官廳公事君諱煥叔晦字也少而奇偉年二十四舉於  
鄉監補魁多士乾道五年省試第二以左迪功郎尉紹  
興府上虞縣鄉村不識胥徒境無犬吠警邑吏匿經界  
籍爭訟紛然令檄追證君拘籍鏑之操驗稽決積弊以  
革淳熙四年調揚州州學教授未上八年春詔為太學  
錄始君為生員即語人曰天子學校當隆師親友循規



蹈矩以倡郡國知臨川陸九齡子壽之賢從而學焉聞  
見日廣朋從趨向悉歸於正既列學官則以昔所躬行  
淑諸人早暮延見學者聲譽日章長貳同僚已懷媚嫉  
會充殿試考官唱名日序立廷下孝宗偉其儀觀遣內  
侍問姓名闕 忌之而君益侃侃自將或勸其姑營職  
耳道未可行也君曰道與職貳乎適闕 試闕 策引孟子  
立乎人之本朝而道不行恥也意似有所諷言路方以  
安靜為大體疑其訕已摘君與長官爭議闕 少折之在

職纔八旬得高郵州教授而去茲可觀過矣明年丁父  
憂服闋選充浙東安撫使幹辦公事用舉主升從政郎  
高宗山陵越帥鄭侍郎汝諧奏充修奉官君移書御史  
請明示喪紀本意使貴近哀戚之心生則芟舍菲食自  
安不煩彈劾湏索絕矣後司尚書杓來復委之檢察君  
治並緣為奸者追賞闕者支損減歲旱常平使者分  
擇官屬拯恤君得上虞餘姚二縣無復流殍諸司交薦  
十五年用常格改宣教郎知徽州婺源縣三省類薦書

以聞上猶簡記許升擢遂通判舒州將用之也光宗覃  
恩轉奉議郎賜緋衣銀魚歸宦官闕益篤為己之學天  
性孝敬父在時每對客必拱侍燕集竟席乃退晚奉母  
尤至頗疑性過剛大書戴記深愛和氣愉色婉容於寢  
室以自警友愛其弟撫養孤姪家雖貧一毫不敢假於  
人甘旨之奉獨豐人疑不貧也聞會稽創義田凡吉凶  
有力不給者飲助有差即白鄉貴効之得田數百畝月  
增歲益遂為無窮之利既病猶不廢書孜孜以人才國

事為言昔曾子論弘毅之士仁為己任死而後己孟子  
謂明善以誠身誠身以悅親悅親以信友信於友乃獲  
於上若吾叔晦所謂任重道遠誠其身以獲乎上者非  
耶自阨間言其志益堅不幸五十三而沒使天假之年  
成就豈易量哉雖然芝蘭當戶鋤之者人也雷風振林  
直木斯拔茲豈人乎天道難言予復何咎既序且銘哀  
而不怨亦叔晦之志也歟君先娶楊氏有賢行前一紀  
卒豐清敏公孫吏部郎中誼從以長女配之四男傳之

魯曾省魯敏曾皆傳父業魯曾今更名杰用宗蔭為迪  
功郎四女長適舒鉗次適呂喬年胡顓次許嫁李知至  
俱名門也孫男一嗣隆孫女一尚幼家闕五卷大率仁  
義之言銘曰

嗟我叔晦行高才全學富於海道直如弦秀出周行頎  
而儼然惟皇側席伊誰忌前可抑者進胡奪斯年命實  
使之彼何誅焉未嘗尤人矧豈怨天其事好還後當觀

綿

均州黃使君牧之墓碣嘉泰三年

黃氏豫章著姓其派豐城縣進以儒而顯以才者均州使君也君諱牧之字穉卿世縣人曾祖表妣葉氏呂氏祖得禮進士起家嘗尉武陵郡之桃源獲盜當改京秩謝不就終柳州推官贈左朝議大夫妣范氏六子三擢第而君之父次山宣和釋褐第一名聲籍籍紹興間擢吏部郎終左朝散大夫贈通奉大夫兵部尚書程瑀誌其墓配李氏章氏君八歲喪父十歲喪母哀動弔者父

澤補將仕郎自幼不羣女兄歸浮梁李氏族長戶部侍郎椿年生席君年十三機警詳雅李舉以訓其子弟逮志學鄉人工部侍郎徐琛以女妻之從臨川徐世英傳春秋學經子百家無不貫穿踰冠求監潭州南岳廟宿其業秩滿調江陵府司戶叅軍太史濤將漕湖北兼行帥事高明少許可選君領闕

自寅入酉出悉蠲加

耗松滋潛江兩邑之間有虎渡堤蓄水溉田數萬畝久不葺松滋令欲葺潛江曰否郡貳主潛江燾屬君定君

曰從松滋則暫勞永逸潛江所謂惜近費忘遠憂也燾  
喜薦於朝太府少卿李安國總六路財賦軍儲在江陵  
者六萬計命君掌出納無分毫差乾道辛卯旱癸巳疫  
拯饑療疾咸賴以濟掌行獄掾盜不應死帥欲殺之公  
執不可帥徐閱案牘喜曰他日無忘此心諸司交薦淳  
熙元年改宣教郎知建昌軍廣昌縣正身率下黜吏奸  
民皆退聽罷預借科罰訟至平心處之獄杆皆清里正  
戶長當役惟恐後暇日按吏卒習射中的者賞盜發輒



得趙丞相汝愚漕江西以政治請聞去為京西安撫司  
幹辦公事八年賜緋衣銀魚漢江鬻城調夫築堤岸部  
役非其人衆情不安君攝倅董之不日訖工堅壯如舊  
明年水大至尺寸弗墊宜城水渠出中廬之西山擁鄔  
水入於沔後漢王寵復鑿蠻水益之溉田六千頃歲久  
廢壞治平中縣令朱紘始修復鄭獬為作記歐陽文忠  
公賦詩美之兵火後渠又廢君躬行相視計日役二千  
工一月可成諸司列上詔可荒野為腴田自君啟之轉

江西提點刑獄司幹辦公事多所平反寧都塞土兵羣  
集於外臺訴衣糧不時傳聞洶洶君白其長代支徐治  
為首者衆乃帖然屬邑負經摠制錢五萬緡虛額兩倍  
文書追擾使者用君言命輸實欠餘悉除之所至上官  
薦其才能十三年擢知均州兼管內安撫陞對乞刺舉  
獄官以清刑罰免民兵科斂試其藝糴襄陽粟實寨下省  
湖南漕運費上皆嘉納至則請修城池備器械章下本  
路或已疑其生事君復疏漢水灘淺可涉害之大者又

欲錄用歸正胥朝杜海馬清子孫子在廟堂嘉其不苟  
多為奏行會武當歸正人辛居簡九家逸去不察者從  
而攻之貶秩一等尋復報罷紹熙元年春也厥初軍糧  
吏俸皆不足滿歲倉庫充盈士民遮道惜其去是歲七月  
辛酉卒於鄉得年五十官自廸功郎九轉至朝請郎明  
年十一月己未葬撫州臨川縣延壽鄉金峯山之原近  
吏部瑩蓋素志也配封安人三男巒文林郎靖州州學  
教紹宗從事郎江陵府司理叅軍巒將仕郎四女適羅

阜臣前死次適葉侍孫羅仲孺曾冕孫男文綜文度女  
七人君早失怙恃於祭享極其孝敬吏部尚書萬卷章  
碩人取資治通鑑授君曰讀此足矣故能明於古今治  
亂及天時人事當官每汲汲功業為文操筆立就嘗著  
芻蕘十議吏部侍郎晁公武侍左郎官公遯兄弟望高  
一時皆以顯用期君公遯贈詩有過我問道我不如之  
句而天不假年把能未試議者惜之二兄崇道義寧早  
世教育二姪闕

逢吉皆貢春官逢吉死無子而有常

產其母求繼於君君以姪孫思永紹其後郡守趙煜義  
之性廉清薄奉養闕官例却添給聞人善稱揚推輓篤  
意教子巒暨紹宗連登科文有家法其猶子疇若筆力  
益高狀君遺事具言賴叔父之教遂踐世科至是巒以  
墓碣為請乃書而系之以銘曰

世有底法之基身抱絕人之資粵趨其赴功在得位與  
逢時疇克備此三者君有之宜似之嗟陸沉於郡邑僅  
得半於期頤相存亡之交弗莽天命之難知尚慶元之不

竭眷後人而永貽

西清楊公為登仕郎李紀行狀盛稱其才誌文之體備  
矣銘則遜予謙之至也乃倣歐陽公尹公故事就為銘

曰

誠齋斯文日光玉潔輝映幽宮永世昭晰

文忠集卷七十八

欽定四庫全書

文忠集卷七十九

平園續稿三十九

宋 周必大 撰

青詞

為村娘設醮青詞

紹熙五年四月

運隨時轉豈無困阨之年民欲天從厥有祈禳之典眷  
言息女比朶沉疴諒由父祖之災坐致兒孫之疾敬茲  
謝過冀乃全生念攸居密近於宮墻願安處永依於道



陰

舊居設醮青詞

紹熙五年六月七日

塵世營營孰知罪戾高穹浩浩每示矜憐自卜一區適  
逢多故豈定數難逃於星運抑攸居偶犯於神明是假  
熏修少伸禳謝伏願天心昭格誠悃潛孚四時無疾恙  
之侵百順有康寧之備永錫子孫之吉全繫覆載之恩

夫人設醮青詞

紹熙五年九月七日

窮乃呼天下愚之真性善於救物上帝之仁心言念良

人比嬰拙恙嘗密祈於保佑幸寢底於安平永為起死  
之功敢昧謝生之報肅哀羽士祇演瓊章効豺獮之微  
誠備蘋蘩之菲薦仰繫造化垂賜監觀一門資覆憐之  
恩四序協康寧之吉

遷新第醮謝青詞

紹熙五年十二月

平生竊祿幸餘三徑之資晚歲營巢載卜一區之宅庀  
工云訖涓吉以遷念蕙蕘冒處於高明且土木或干於禁  
忌欲謝生成之賜當崇清淨之緣相協厥居密庸其道

善必積而慶有敢忘人事之修福莫長於禍無全賴天  
心之鑒

火字照臨設醮青詞

歲月日時之易或遇灾屯吉凶悔吝之生率由動作矧  
游官叨踰之已甚且平時罪戾之有加限適在於字強  
命更逢於火照粵從遷徙未底康寧歷陳既往之愆仰  
瀆蓋高之聽伏願廓恢恢之網赦蠢蠢之愚百疾不侵  
獲保子孫之吉四時有慶永致宅舍之安

本命設醮青詞

薄德而享者厚自謂非宜無功則過也深常虞罪戾仰  
依覆幬俯遂安恬敬因本命之辰仍近初生之度肅陳  
菲薦祇述謝誠伏願洪造垂矜大恩普護老幼有康  
寧之福公私無非橫之災

夫人設醮青詞

慶元五年

庶事叨踰久知福過五行遷易今值運交臨以元辰壓  
之太歲宜多疾恙敢急祈禳伏願善貸積愆博施洪造

誕保安寧之慶永依清淨之緣

又慶元六年四月丙午

日往月來曾微一善之積星移運轉每懼四時之灾况  
年齡俱迫於晚途且歲度將逢於威曜懇具禱祈之志  
精虔禳謝之誠伏願洪造下臨忱表上達賜以平平而  
無禍俾之碌碌以全身闔門資負覆幬之恩永世竭重  
修之敬

又慶元六年十月三日

日來月往身每積於愆尤福過灾生家常櫻於疾恙賴  
乾坤之大德全犬馬之微生祇竭誠心敬陳菲薦伏願  
博恢洪造垂鑿丹表照以陽光常回於暖律消其陰譴  
如津於春水

本命設醮青詞 嘉泰二年三月一日

疾以為憂瀝匹夫匹婦之懇藥斯有喜荷蓋高蓋厚之  
恩載推元命之辰適在季春之吉集黃冠於琳宇償素  
願於華門科式攸遵頻繁是瀆伏望真游降格誠悃潛

通赦歲月之愆尤錫四時之康泰顛天之請踏地以頌

又嘉泰三年十月一日

以時衡歲各致灾屯無德有年仍多罪戾屬背脾抱瘡  
瘍之疾憶室家形祈禱之言茲臨元命之辰乃籲初心  
之請高高在上已蒙從欲之恩懇懇由中敢昧謝生之  
志誕敷康寧之福各安哀晚之年

追薦亡妻九幽醮詞

嘉泰四年正月

悼亡浸久莫返於逝波卒哭將臨仰干於浩造招延羽

士稽首仙科頻繁之薦雖微伉儷之誠斯竭伏願天庭  
垂閔泉路蒙休下赦宥於丹霄翦愆尤於黑簿熏修懇  
惻冥漠超昇



文忠集卷七十九

欽定四庫全書

文忠集卷八十

平園續稿四十

宋周必大撰

道釋

偈

銘

贊

題跋

說

記

塔

偈銘

楊待制朱待制因甘叔懷道士戲以是同是別

兩池兩月相為問答某亦說偈

慶元五年十月六日

閩嶺江鄉三散人更添闔阜一彌明何須和會方為一

月入平池體不分

恩褒覺報禪寺鐘銘

慶元四年正月十八日

金本無聲乾鐘乃鳴聲雖在鐘幽空則宏粵若斯器出虛以成  
朝擊暮撞驚昏發冥上通諸天下徹九京從聞思修覺我先靈

贊題跋

仰山長和紹南真贊

精神如虎在山談辯似瓶翻水誰家靈利衲僧妙善孫佛照子  
老納祖證姓潘劉陽人因妻殺鴨不死投月菴為

僧壽八十一道人蕭妙慶求贊

慶元四年二月二十五日

捨俗歸真五十年自誇曾悟月菴禪誰知因殺能言鴨  
拾得王孫金彈丸

龍安主僧仁遠出德光頂相求贊

嘉泰四年二月

靈隱山前口說喃喃龍安寺裏目視耿耿彼一此一前  
三後三語息則默學人更參

題西峯豁禪師雜錄

右西峯豁禪師禪錄一冊元本淆亂差訛稍加訂正而

歸之寺今定陵宸章止存石刻元豐郡守魏綸跋語疑  
太和宰黃庭堅代作云紹熙甲寅重五日周某題

跋顏持約所畫定光古佛像

顏持約諱博文德州人政和戊戌甲科第十人靖康中  
南遷過廬陵知定光古佛得法於西峯邦人信嚮乃即寺壁  
手作畫像今七年矣中間梁道跋而下題名者數人多知名  
士歲遠日就剝落住持僧惟嵩摹而刻之非特可以傳久亦  
欲家有其本為持鉢乞食之助云慶元二年十二月七日

書僧中傑辯老氏論

豫章僧中傑著論二萬餘言扶持釋教證近世老君寶錄之訛傍引儒書極為該貫求予一言予雖嘗涉獵載籍今已昏忘釋老二教又非素習安敢妄有折衷昔野人爭蕉鹿而疑夢覺鄭士師二分之謂非黃帝孔子不能辨也予於此亦云慶元己未四月

跋德光與梁世昌頌

大慧禪師住世時杜撰長老人人謂得其道今四十年電滅無

餘唯佛照禪師真朴實頭之的嗣既壽且康續佛慧命微斯人  
吾誰與歸梁光遠得此頌藏之二十年若識本來面目是名參  
禪不然予復贅名故紙之後是結兩重公案也嘉泰壬戌八月

題陳瑩中寫旃檀觀音贊華嚴經語李伯紀跋

陳忠肅公南劍人李忠定公邵武人兩邦相望而產二賢客  
有示其翰墨者敬題於後慶元六年四月十七日周某子充  
題鄭亨老新刻楞伽經

廬陵別乘鄭亨老新刻楞伽經謹書東坡蘇公為樂全

張公發揮之語附於後蔣穎叔所記大槩相類故不重錄經止四卷因智嚴注多增為七卷詳見序中昔張公年七十有九以此授僕年適與張公同但不能幻滅都盡惠光闕圓為有愧耳嘉泰四年五月某日

題鄭亨老新刊注維摩經

紹興丙子丁丑歲寓闕山之姻館是時廬陵郡丞鄭亨老侍親

闕府年方弱冠儒釋兼通日夕相遇今將闕十年乃得與老農

比身畎畝茲者王覲有日示新刊注維摩經十卷輒題姓名庶



幾他土異方共弘斯道如僧肇所云嘉泰四年五月某日

說

贈仰山長老紹南

大慧果公說法如快馬斫陳何敵不摧接物如洪爐鼓  
鞴何鐵不化一傳佛照光再傳仰山之南所謂有是父  
有是子者始予隆興初識果於徑山淳熙中會光於靈  
隱紹熙間歎南於開福三十三年見其三世矣燈燈相  
續知復何人南勉求之有則告我乙卯九月二十六日

戲答劉江

往歲安福士人刻木為觀音像以施予予問云不云聽  
而云觀何也士未能對近劉伯深解元復以蜀繡像請  
益予告之曰子讀普門品乎無盡意問佛子何因緣名  
為觀世音佛以善應諸方所答之又云真觀清淨觀廣  
大智慧觀悲觀及慈觀又云妙音觀世音梵音海潮音  
勝彼世間音今常人眼力所及則見不及不見也菩薩  
能以千手千眼善應諸方何所不及况所謂音者非止世

間之音乎發大清淨願運大慈悲心六道四生何所不  
觀乃欲以世間耳目視聽論之陋矣劉君曰唯慶元六  
年

記

臨江軍闔阜山崇真宮記 慶元二年十  
二月十五日

古者名山大川在中國者皆雄尊浩蕩頌於祠官天子  
巡狩望秩為民祈福而已荆之衡嶽猶以為遠自有熊  
氏已祀瀟霍况其他乎當是時上既不求遠畧下亦安

其常居雖有黃老之言何自而入深山窮谷稀竒絕特之觀誰實顧之及周穆王車轍馬迹馳騫乎八荒中天之臺瑤池之宴浸傳於世秦皇漢武忻然慕之由是有為黃老之學者轉而為方士之術負策抵掌順風而至羨門安期之說興徐福少君之詐作當是時上雖信之其徒未盛於下也及乎土宇日廣生齒日衆遐方僻地列置郡縣王喬蒞子訓左慈輩又爭以神怪風動四方於此時也豈特人主嚮之所謂四民往往從之者衆必

有所聚既不能安處於市廛則披竒擇勝梯崖架險設壇場立室廬茹芝鍊丹於人迹不至之地一崑洞之幽一川谷之秀殆將無所遁其形宮觀遂徧天下而猶盛於東南此積習之執然非今昔之理異也彼所謂清都帝居十洲三島既茫昧不可考而洞天福地載之傳記有可言者距臨江軍四十里山曰闔阜蓋福地之第三十三也自漢末張道陵葛玄丁令威皆有壇井故寰宇記以為神仙之館舊隸吉州新淦縣逮臨江析軍乃屬清

江山形如闔山色如阜以是得名初置靈山煨於隋爐  
至唐道士程信然掘地得玉石像尺餘覆以鐵鍾創草  
堂居之先天元年孫道冲始為臺殿因山名觀咸通大  
火玉像僅存楊薦父子次第葺之江南李氏改名玄都  
本朝避聖祖諱又改景德天禧庚申熙寧丙辰再焚再  
葺正和八年始賜號崇真宮前對靈雲峯後倚東西兩  
山山皆有壇其東葛也其西張也水出宮後名葛憩涼  
凡半里餘聲闕行石間大抵葛仙遺迹為多故崇寧

間封冲應真人誥命在焉北有令威而基合為一久矣  
入門即御書閣十一楹藏闕頤陵賜書百一十八幅章  
聖封泰山芝草二本皇祐新樂圖一卷紹興宸翰十軸  
閣後設傳籙壇蓋法許授籙者惟金陵之茅山信州之  
龍虎與此為三徽宗朝給元始萬神銅印至今用之次  
曰金闕寥陽殿曰昊天殿曰正一堂曰靖應堂其東曰  
祖師殿曰藏殿最後玉像五間其崇五丈四尺雄傑冠  
於一宮凡殿於旁翼以修廊道士數百人環居其外爭

占形勝治廳館總為屋千五百間江湖宮觀未有盛於斯者士大夫川浮陸走無不迂途而至乾道癸巳予亦至焉讀廣明許元真咸平張賀熙寧雙漸陽申元祐張商英諸碑雖隨事登載辭頗異同如以鐵鍾為開皇舊物視其款式則咸通十三年所鑄也玉像有三其一憑几而坐二人跣足立侍亦與所書不合於是主者李漢卿王允成王次鼎俱以宮記為請予諾之而未暇今管轄王自正知宮鄒時億副劉惟允度師陳處和懇請益



堅予惟易觀為宮殆且百年此而不記闕孰甚焉乃為  
會萃眾說詳考初終使好事者知自昔道家者流凡三  
變而其教成此宮因地之利歷千年而其制備庶幾有  
考焉若夫叙勝際詠清虛則有前代孫偓李洞宋齊丘  
沈彬孟賓於徐鉉陶弼之留題近世道士張景先陳孟  
陽陳彥舉黃常吉之詩集傳於山中此不復云慶元二  
年十二月十五日

麻姑山仙都觀新殿記

物生天地間有象斯有數成毀相尋抑有理焉孔子作  
春秋既書成周宣榭火有書晉梁山崩夫無室曰榭猶  
未免於火山有朽壤亦未免於崩况夫名山勝境道宮  
極土木之工歲月浸久非朽即燬豈特數哉理固然也  
或葺或新乃傳無窮建昌軍本撫州南城縣出南門六  
七里有麻姑山予嘗游焉自尋真亭而上徑蹊紆峻次  
以界青雙練枕流三亭懸瀑對瀉雪濺雷吼天下奇觀  
也進至龍潭唐明皇時黃龍嘗見至今自此驟得平地

是為仙都觀世傳蔡經舊宅方士號丹霞小有天麻姑  
事實具載顏魯公碑仁宗嘗賜飛白采字元豐間封清  
真夫人元祐改封妙寂真人徽宗加號真寂冲應元君  
傍曰元通之殿皆宣和御筆也觀後齊雲亭望軍城僅  
如聚落其西闕里別有丹霞福地初循稻畦尋復陟巘  
兩山之間眇畝層出源泉灌注旱則蓄之故不乾澇則  
洩之故不溢黃冠藉以自給慶元六年庚申三月戊寅  
融風告灾棟宇夜燼明年改元嘉泰知觀事李惟賓創

正殿七間博十丈深六丈有奇依營造法式容閣帳三  
間分列三清及天帝地示九位於上其下則元君居中  
東偏奉宣和二碑三朝內禪詔西為皇帝本命殿宏壯  
華麗殆過於舊羣祠外環三門前聳位置先定以漸圖  
之方營求之初故妻益國夫人王氏首施錢三十萬於  
是惟賓以記為請按顏碑及郡人李恭伯文觀興於天  
寶至梁凡百六十年而葺焉由梁迄本朝康定辛巳垂  
百四十年敝又改為今復一百六十年數雖遙然理則

存乎其人戒謹所不睹恐懼所不聞何畏乎鬱攸風雨  
攸除鳥鼠攸去何憂乎朽蠹東海揚塵猶或可待況二  
百載之近乎三年十二日旦周某謹記

廬山圓通寺佛殿記

宮室取諸大壯貴賤可以通稱特崇卑廣狹有別耳秦  
孝公強盛時大築冀闕由是天子殿中初見商子定分  
篇臣侍殿上兵陳殿下後載史記荆軻傳大抵秦制也  
至始皇併天下殿屋相屬又作甘泉前殿前後殿之名

始立西漢黃霸丞相府計吏上殿東漢司徒有大會殿  
蓋車駕或臨幸會議於此而有殿名非專指屋之高嚴  
也若王根董賢則史氏明言其僭矣華嚴經云世尊於  
普光明殿坐師子座其他摩尼莊嚴等名甚多蓋胡僧  
入中國知以宮殿為貴故譚經者亦易其名殆非竺書  
本語雖曰上擬皇居然法不禁也江州廬山之陰石耳  
峯之下當國朝乾德開寶間江南李後主及昭惠周后  
創觀音圓通道場以奉瑞像命道濟禪師緣德主之今

號崇勝禪寺東坡蘓公嘗留詩頌最為名刹乾道丁亥  
予嘗至焉中經兵阨惟青石架梁導溪水徧給僧舍凡  
二百五十丈儼然如故餘非舊物矣正殿初奉觀音後  
改塑釋迦文殊而環以二十五圓通紹熙壬子秋闕長  
老師序自開先移住此先明年十二月癸丑回祿為災  
焚蕩無孑遺序苦辛經營閱二年浸還舊觀殿猶未備  
郡人劉必達以母田氏命施錢百萬造殿五間起慶元  
丙辰迄丁巳冬落成宏麗堅壯寔與寺稱而像設未備

戊午歲廬帥高司農變倡楚城潘汝綱筠州延福院僧  
宗禧及好事者爭和之於是眞釋迦文殊普賢像於前  
十八羅漢分列左右塑觀音像於後而圓通諸菩薩環  
之庚申春畢工遠來求記予既推原名殿之由知佛之  
尊又諗序曰壞於劫火存乎定數成以願力則繫人為  
師之始至適遭厄會不憚艱竟成勝事非願力耶昔天  
竺僧耆域至洛陽望見晉宮闕曰大畧似忉利天但彼  
道力所成此衆生淨業之力師其勉率爾衆期於見性



雖復山河變滅而不壞者固存此之謂道力土木云乎  
哉四月十五日

汀州定光庵記

佛以慧日照三千大千世界顧豈滯於一方然日出暘  
谷浴於咸池拂於扶桑躔度必有所舍其明難與它等  
此定光庵所由興也按臨汀郡治于城內東北隅有卧  
龍本朝定光圓應佛普通慈濟大師真身所棲之地淨  
戒慈陰靈感威濟大師附焉殆猶日之躔度與按定光

泉州人姓鄭名自嚴年十七為僧以乾德二年駐錫武平縣之南安岩攘凶產祥鄉人信服共創舍賜額均慶淳化二年距岩十里別立草庵居之景德初又遷南康郡之盤古山祥符四年汀守趙遂良機緣相契即州宅創後庵延師往來至八年終於舊嵒先有寧化僧慧寬姓葉氏能馴暴虎號伏虎大師居州東五十里庵號普護建隆二年將入寂定光往視之云後二百年當與兄同處一庵至元祐中守曾孝宗始增葺後庵正名定光溥

熙二年守呂翼之遂迎定光真身於南安岩而為之主  
又迎伏虎真身於廣福院而為之主二百年之讖果驗自爾  
州無水旱疾疫號為樂土南安舊岩屢乞師還守不能  
過百夫肩輿屹然弗動老稚悲泣而退慶元二年郡守  
陳君曄增叔拜亭及應闕堂嘉泰二年其季映復守茲  
土每集僚吏致敬患其隘隘乃裒施利錢二千餘緡以  
明年三月十七日鳩工為正殿三間博四丈二尺深亦  
如之寢殿三間博三丈深居其半三年闕堂廊廡等總

十有八間官無一毫之費逮六月訖工謂予姻且舊求  
記文予惟二君皆以才能為二千石政成俱擢廣東提  
點刑獄而去孜孜舊治凡可徼福加惠汀民者無不用  
其至予故樂為之書以代邦人大小馮君之歌若夫惟  
從之典靈異之迹圖牒載之前輩書之茲不復云嘉泰

三年十月

塔銘

園鑑塔銘

法不孤起道不虛行續佛慧命必有其人謂誰佛照禪師其人是已師諱德光姓彭氏臨江軍新喻縣人曾祖崇善祖堯訓父術皆樂施喜釋氏嘗籍鄉里貧戶計口給錢宣和辛丑歲母袁氏夢異僧入室有孕生師骨相竒龐伏犀貫腦袁州木平山有妙應大師伯革者善相謂此子他日空門梁棟也初入小學讀書十行俱下父母繼亡依伯父循以居一日延僧追修師視佛書若素習然紹興辛酉大慧禪師宗果南遷過邑師年二十一

望見曰此古佛也吾安得事之自是意出家後二年師  
拾光禪院受業為足庵普吉研究宗旨日以精進吉還  
閩命從月庵善果於東禪服勤三年是時妙湛佛心圓  
覺乾元越山諸禪刹名僧相望師一一咨叩聞江西百  
丈道震嚴冷寶峯擇明峭拔俱入其室一日見饒州天  
台寧應庵曇華送化主頌歎曰此真臨濟種草亟往依  
之雖箭峰相直然礙膺未決復從果老於馮山果入寂  
還江西謁典牛天游於雲巖見萬庵道顏於圓通會曇

草移廬山之東林婺之雙林師皆從之丙子歲聞大慧  
住四明阿育山喜曰緣法在茲矣已而果大徹慧示以  
贊畧曰有德必有光其光無間隔名實要相稱非青黃  
赤白慧歸徑山明月一堂師奉事益虔遇說法坐下爭  
執筆抄錄師一歷耳根終身不忘有聞輒舉其慧解蓋  
天資也慧入塔分坐仰山乾道丁亥台守李侍郎浩延  
住鴻福闕五年徙孝光郡城大火寺亦焚蕩師念災餘  
財施必艱航海過泉州人競喜捨厚載而歸殿宇一新

師自號拙庵曰吾平生多得拙力孝宗皇帝雅聞其名  
淳熙三年春詔開堂靈隱寺遣中使賜闕是冬召入觀  
堂留五晝夜數問佛法大旨師敷奏直截上大悅賜佛  
照禪師之號贈以御頌明年再對晉宗門直指以都下  
勞應接丐閒山林七年夏上用仁宗待大覺禪師懷璉  
故事亦以育王處之逮移御重華趣令入覲漏下十刻  
乃退紹熙四年改蒞徑山師力辭孝宗曰欲時相見耳  
慶元元年許還育王歸老東庵盡鬻錫資物直數萬緡



置田歲增穀五千斛助常住費詳見陸待制游記中師  
常曰佛經有大報恩七篇謂釋子當由孝以極其業乃  
即水陸堂東偏設位歲時祀其祖云嘉泰三年仲春忽語  
云吾將行矣三月十七日手寫遺表及貽書常所厚者  
二十日晨興集衆叙別斂衣收足說偈而逝三十八龕  
容貌如生塔全身於東庵之後請謚於朝敕特賜普慧  
宗覺大禪師塔名園鑑僧臘六十夏嗣法者徧滿四方  
得度者一百二十餘人名公貴卿多從師遊海東國人

往往望風歸散初璉六十歲自汴京來育王壽八十三  
師始終適同茲其異也八月侍者正玘持遺書來謂先  
師與公幸接鄉隣同受阜陵異知以塔銘見屬其行  
述則同里兵部章侍郎穎為之子聞時節因緣鐵芥啐  
啄從上諸聖不能強為喻筏刻刻劍徒增我慢况對御法  
語世已流布得道原流接物幾要叢林門第各存語錄  
姑叙住世大畧如此銘曰

我聞物生各具物性人有未見見或未盡偉哉光公宿

習戒定頓入悟門遂傳心印福慧兩足行解兼進魏魏  
孝宗見聖由聖與師晤言謂法深省晚歸東庵不倦接  
引八十二年報緣已竟勿云鏡明昔見今隱一物本無  
何用照映勿云谷虛有叩誰應十方皆空何論銷殞摘  
葉拈花繫風捕影持問塔中解顏微哂

文忠集卷八十

欽定四庫全書

文忠集卷八十一 省齋別稿一

宋 周必大 撰

詩 題跋 並代作

送陸先生

府赴春闈 代十弟  
紹興辛酉

九重詔下選賢能  
又見先生啟遠行  
離恨暗隨流水去  
朔風穩送片帆輕  
休嗟此日睽違事  
預發來春晉錫榮  
一去鵬程應九萬  
始知佳夢合金精

同前

代李及之

何幸天涯歎緒餘  
軒昂氣槩識雄圖  
滔滔腹稿盈千軸  
凜凜詞鋒敵萬夫  
方對芝眉蒙數載  
乍驚絳帳失規模  
從茲穩步青雲上  
始信沙堤夢不誣

余石月輓詞

甲戌

學重今顏子  
年高漢伏生  
鯉庭傳道德  
鱣序列公卿  
忠孝平生事  
詩書後世名  
於公無一憾  
多士自傷情

自我居洪府  
從公父子游  
至言今在耳  
往事忍回頭  
風急唐

山壘雲埋石月樓生芻無路莫洒淚寄東流

泰州守許寺正輓詞二首

代外舅

昔在西京日名臣數次公人歌廷尉德帝念潁川功出  
處君何異修良譽亦同誰提班固筆千古紹高風

身襲黃門慶腰懸紫綬龜未登知命歲遽逼蓋棺期風咽哀  
笳恨雲凝斷壘悲只應潘岳淚重憶悼亡時

孟郡王

忠厚

輓詞二首

丁丑

炳靈崧嶽古諸姜令德高標對寵光位冠西樞籌運幄

班高左棘繡為裳  
丁年聲譽佳公子  
二紀功名異姓王  
人物風流今已矣  
空令吳越詠甘棠

祥源總使奉真游  
藏室提綱接勝流  
書蠹只知三館樂  
盤鯖不鬪五侯羞  
名山早晚尋黃石  
逝水須臾失夜舟  
白馬素車分散後  
何人更忍過西州

張朝宗挽詞二首

代外舅丁丑

耆舊推西洛於公見典刑  
全名高白壁利刃拂青萍  
日者瞻卿月天乎隕使星  
平生精藻鑿桃李半槐庭

甲第開鄰里蝸廬遂不孤  
相從期晚歲太息奠生芻  
涼吹飛丹旒殘陽詠白駒  
傷心松柏路螭首戴龜趺

大行皇太后挽詞二首

代方總領已卯

瑞應興沙麓祥源發豨韋  
東朝方母育滄海倏塵飛  
蟾暗水輪影鰲翻地軸機  
宸心懷慕處篋有五時衣  
媯汭芳聲遠思齋聖德優  
湘妃初從舜文母晚興周  
養桑慈寧樂神同永祐遊  
鳳車青羽蓋忍望浙江舟

同前



得道西王母思齊古太任仙游歸少廣人世失徽音閨苑桃空熟稽山栢自森天心知舜孝寒日恹多陰

憶昨登中壽梅觴慶九重回春方晝永月掩遽雲濃鐘鼓沈長樂蠶桑罷濯龍宣仁遺懿在定謚獨追蹤

題跋

跋平江蔣守帖

代程崑山沂

璿守郡朝夕勉竭但老朽無補事功今歲必謂境內登稔秋稅不勞而辦乃承垂諭如此聞名闕然農夫辛勤

不得厚獲具轉徙固宜切望悉意拊集諭瀕臨江海細民許其就便送納粳米庶免般運勞費俾之少安則郡縣之本也左右勤民如此安得不如來命公檄未到間一切曉示使之通知為佳諸邑赴府倉者亦不令多有費用滯留區區之心惟欲利民耳

右手書二通太守蔣公諭屬令以勤民之指也公繇天子侍臣來鎮輔藩惠足以存下明足以恤隱故雖尺牘而周悉勤懇如此昔韓愈有言賦有常而民產無常水

早癘疫之不期民之豐約繫於州縣縣令不以言連帥  
不以信民就窮而歛愈急嗚呼使唐之守帥能以公之  
心為心則愈言何自而發哉公之筆精墨妙獨步當世  
人得半橐自應藏去以為榮況夫利民之心昭然在是  
沂也何敢獨拜嘉命而私諸篋衍乎固宜治金伐石揭  
示百里俾為吏者目擊而戒追呼之擾為民者戶知而  
殫樂輸之誠一舉而二美具焉蓋公之賜也沂之幸也  
紹興二十七年十一月日

跋曾祖題名

代吳司戶哀

政和三年癸巳閏四月甲午朝拜茅山景福萬年殿遂  
行告遷奉安之禮遵上旨也已未還府家弟樽男敞激  
檄來迓於此知府事建安縣子吳拭題

曾大父昔持從橐鎮金陵距今四十六年中經搶攘山  
川良是城郭非矣去府二十有五里寺曰祈澤如魯之  
靈光巋然獨存曾大父題名在焉哀來主辭曹恭覽涕  
下飭匠摹寫鏡諸樂石豈惟紓念祖追遠之心亦使父

老過之對甘棠而思召伯讀峴碑而泣羊公也

跋陳丞相手書

代十九男

高文大冊屬意而為則其詞章黼黻筆墨精妙理亦宜  
之若乃書疏填委引帑占答此豈有意於其間哉特以  
溫厚之性根於中故雖造次皆樂善之言心畫之妙應  
於手故雖游戲皆絕人之藝昔漢嘉威侯瞻辭善書數  
百封親疏各有意人得尺牘皆藏去以為榮丞相蓋其  
苗裔與何道大德全而餘力猶至于斯也某竇此十餘

年矣我公方運造化以鑪錘一世如某盤跚闖茸仕愈  
久而身益困視鞭景而弗悟委袞褒於草莽凡前日拜  
賜之榮祇所以為今日之愧與年月日

文忠集卷八十一

欽定四庫全書

文忠集卷八十二

省齋別稿二

宋 周必大 撰

表

奏狀

奏劄

中省狀附並代作

謝賜歷日表

紹興十八年  
辰州作

欽崇天道初觀玉歷之成謹授人時均下璽書之賜仰

祇德意俯佩恩榮

中謝

恭惟皇帝陛下輔相兩儀總齊

七政大法協於五紀克叙彛倫閏月定乎四時靡垂躔



次推本聖心之自蓋先民事之宜故此遐方亦頒密度  
臣敢不深思奉順務稱嚴恭東作西成行見京抵之積  
南洽北暢豈惟正朔之同

同前

紹興二十七年代  
外舅廣德軍作

欽崇天道課玉歷於清臺謹授人時下璽書於方國凡  
任承流之責舉深拜賜之榮中謝恭惟皇帝陛下功錫禹疇  
德齊舜政災圖載赫既聰明睿智以有臨皇極用成宜歲  
月日時之無易申命居卿之職載嚴頒朔之文天始地終

得大衍自然之數珠連璧合驗太初最密之祥誕告多方用興嗣歲臣敢不仰推聖意編諭封圻九叙惟歌使咸知於帝力三時不害期各厚於民生

同前

紹興二十九年

日官推數當五年再閏之期王者頒常下三統四分之  
歷凡叨守土敢怠承流中謝恭惟皇帝陛下把握陰陽彌綸  
天地授太玄之神策協洪範之彛倫水火金木惟修坐致九  
功之叙歲月日時無易預知百穀之成爰即上春編預密

度豈特新又新而無弊蓋將朔復朔以何窮臣一分銅  
虎之權三拜重書之賜年運而往竊自驚齒髮之衰民  
愚而神願謹示農桑之候

同前 紹興三十年

參萬歲以成純方衍無疆之數以四時而為柄用頒有  
截之區望雲祇拜於君恩愛日益勤於吏事中謝恭惟

德隆廣運化本密庸仰膺申命之休俯謹授時之政地  
法天而天法道據四大以宅中正次王而王次春殖萬

民而布治況歲直金穰之次而歷符璧合之祥農力穡以無違吏窺文而竊抃臣敢不勤敷聖意徧諭部封時和年豐顧已示夢魚之兆家給人足愧莫施流馬之功

賀重脩皇太后回鑾事實表

紹興二十六年代外舅廣德軍作

冬溫夏清久承長樂之顏文瞻事詳今紀蘭臺之筆母儀既著聖治愈光

中賀

臣聞周美太任詩人發詠漢迎

薄后史氏特書儻汗青不載於一時則副墨孰傳於萬世於皇盛舉克掩前芳恭惟仁冒華夷孝通天地締盟

北道永清萬馬之屯致養東朝夙返六駟之馭言念皇家之殊慶豈容悼史之闕文既詔諸儒纂事而書之策復資上宰帥屬而獻於王昭哉典籍之精詳導以禮儀之繁縟風傳六服喜動羣工臣身也滯南心焉拱北班香宋艷莫窺三館之藏舜日堯年願祝兩宮之壽

賀皇太后慶八十表

紹興二十九年

東朝衍慶方膺難老之祥南面稱觴適及常珍之日遭行正旦喜浹綿區

中賀

恭惟道貫神明仁漸動植久躋

民於化國每養志于慈寧億載萬年人頌唐宗之孝四  
章一節歲踰漢歷之元當熙春肇始之時舉邃古未行  
之典動鼓鐘于長樂聲氣咸和滿環珮於後宮儀容大  
備豈特親親而廣九重之愛又將老老以來萬宇之懼臣  
屬守近藩莫趨邇列思齊所以聖佇觀則百之男天保  
莫不增更祝無疆之壽

同前

德盛母儀方茂松椿之壽誠殫子道遂稱椒栢之觴禮

容肇講於宮庭德教遠加於海宇中賀恭惟仁先廣愛  
志務寧親以綉裳畫袞而為戲彩之榮以芳膳蘭殮而  
備常珍之奉繇上帝眷一人之孝致慈闈開萬歲之期  
乃稽興慶之舊儀兼舉建隆之故事受茲介福於其王  
母豈惟並擁於休祥建其有極錫厥兆民蓋亦咸躋於  
仁壽臣誤持龍節莫遑鵷班則百斯男願嗣文母徽音  
之雅既多受祉載賡魯侯宴喜之詩

賀皇太后牋

慈闈就養春秋宜過于八千寶曆更端甲子將周于五  
百舉慶儀於內殿溢和氣於外庭中賀恭惟皇太后殿  
下沙麓儲精塗山啓瑞誕育聖神之主茂揚慈儉之風  
鍊石而補皇天不愧女媧之巧得桃而坐少廣莫知王母  
之年祲容爰講于三朝純孝益隆于萬乘國家賴慶簡  
冊增光臣適綰郡符阻瞻禁幄橐弓戢矢早知武王十  
亂之功含飴弄孫行應堯帝多男之祝

同前



七紀垂周得金母長生之道九重致喜講玉卮為壽之儀兆和氣於芳春騰懽聲于華夏中賀恭惟皇太后殿下篤生上聖密贊中興好黃老之言何慚漢后茂姜任之德克紹周京美延南極以無疆福脩東朝而未艾爰因歲旦肇舉禮文奉萬歲之觴共知天子之孝極九州之養永居帝母之尊臣將命和門傾心盛典融融洩洩豈資潁谷之封人怡怡愉愉請頌元和之聖德

皇太后服藥赦書表

孝無大於寧親方謹寢門之問仁莫先於赦過肆空牢

戶之囚伏聽詔音灼如聖意

中謝

恭惟勤脩子道祇奉

母慈散和氣於綿區無幽不被洽善祥於長樂何恙勿  
除豈資藥石之功自得天人之助臣猥塵遠使獲奉寬  
條動植被虞帝之恩既隆孝治燕喜壽魯君之母願繼  
頌聲

同前

問安視膳躬定省於九重解饒除苛洽寬仁於四表堯

言誕布舜德益昭中謝恭惟孝通神明仁浹黎庶介祉  
欲臻於文母施恩爰暨於周民事親足以解憂天心所  
相勿藥至于有喜坤德自寧臣猥使近畿祇承溫詔祝  
三面之網已騰樂國之歡呼奉萬年之觴即慶慈寧之  
康復

皇太后升遐慰表

紹興二十九年

慈闈書掩哀訃夕傳凡思持載之功舉抱推傷之痛

中慰

恭惟事親盡禮侍膳殫誠以承文母之顏徽音遽隔遠

邁顯宗之孝追慕何窮願寬陟此之悲少副普天之望

同前

駸馭上賓終天莫返駒懷永慕履地所同

中慰

恭惟德

邁舜文行逾曾閔幾年膝下親承壽母之顏一日宮中  
頓失慈寧之養雖聖孝深思於載育而民心咸懼於過  
憂願抑至情俯安羣下

同前

母儀久正坤載俄隳凡在含生舉懷悲慕

中慰

恭惟仁

先立愛志務寧親侍膳問安備殫誠意省刑薄歛式慰  
母心豈期天命之難諶終嘆慈闈之遽掩雖一人之孝  
方永念於劬勞然萬務之繁當深思於節抑

同前

釁結束朝悲纏中夏遙知晬穆正切哀恫

中慰

恭惟性

本自天行皆高世漢文至孝晨昏無解帶之安虞舜好  
生遠邇釋畫冠之禁既勤施德謂可寧親脩聞厚地之  
傾莫曉彼蒼之意願思適變毋致過哀上以符慈寧治

命之言下以副黎庶誠心之懇

慰冬表

紹興二十九年  
代江東漕司

化國日舒徐行北陸聖人孝至永念東朝凡在輿情同  
深孺慕中謝恭惟德隆天性報厚母慈當官線之初添  
悵禕衣之浸遠率百官而為壽忍虛興慶之曩儀幸舊  
宅而會冬益愴永平之故事願抑對時之感俯安率土  
之心

同前

望雲氣於觀臺甫念新陽之至斷鐘聲於長樂莫陳亞  
歲之儀上切哀恫下均感慕中謝恭惟行高文帝孝邁  
有虞誦凱風聖善之詩悵六駝之永隔當化日舒長之  
候視一線以增悲仰祈宸抱之少寬式對天心之來復

同前

代方總領

亞歲甫臨方講漢儀之舊徽音浸遠共深文母之思遙  
知睟穆之光正切哀恫之慕中謝恭惟道同堯舜行過  
參騫罷長樂之壽觴深悲節物望慈寧之總帳益動孝

思願寬追遠之懷茂對履長之序

慰元正表

紹興三十年  
代方卿

行夏時而正曆荐易歲華履春露以念親益昭聖德凡

預載持之數共懷怵惕之思

中謝

恭惟以大孝而顯揚

任姒之徽音以至尊而度越參騫之高行當萬國貢珍

之在列嘆東朝靈几之方新珮響唐宮莫展壽觴之禮

鐘鳴漢殿暫停元會之儀願寬追遠之心茂對履端之

序臣猥將使指不獲躬詣東上閣門



顯仁皇太后發引慰表

代方總領

陟彼岵兮爰卜青烏之吉維其時矣遽瞻畫翼之行祖

載凌迤聖情惻楚

中謝

恭惟德鍾天性道冠人倫粵符

素奈之謠彌切蓼莪之感親喪固所自盡也內不廢於  
三年聖德又何加孝乎外已刑於四海逮茲遣奠尤極  
哀悰顧淑寧已隔於東朝惟追慕少寬於南面

同前

龜猶告吉翟駕即塗念慈矩之長違知聖情之永慕

中謝

恭惟皇帝陛下高行超於今古純誠貫於神明自懼文  
母之哀益顯有虞之孝送終盡禮遣奠及期瞻披綍之  
在庭宜柩圈之增感願副羣生之望少寬罔極之懷

殯宮禮畢慰表

代方總領

駟馭上賓武帳久虛於長樂龜猶未諗容衣遂闕於稽  
山一人嗟慈範之違萬國嘆坤儀之遠

中謝

恭惟純誠

冠古至行積中慕親之心未常息焉報喪之禮可謂盡  
矣神靈為之顯相天日至於晏溫用葛無麻蓋異魯君

之母因山配地實同唐室之規仙寢既成真遊莫返追懷聖善固益動於孝心俯為邦家當勉裁於愛慕

同前

日月有期爰畢因山之制寢園在望共勤陟屺之瞻追懷太妣之徽音益惻武王之達孝

中謝

恭惟德隆天性

念極母儀既哀戚之內深亦禮文之外盡為之宅兆奉長樂之禕衣見于蒼龜祔祐陵之吉壤逮茲甫窆孰不纏悲雖上聖烝烝痛長違於慈矩然下民懇懇願勉抑

於至情

祔廟禮畢慰表

代方總領

設祭以虞少駐言歸之馭祔姑而祀永綏如在之靈通  
觀彛典之成彌顯聖人之孝

中謝

恭惟行為世法性本

生知宅憂每越於常情制禮率遵於故事瞻文王之清  
廟久矣寧神顧太妣之徽音茲焉登配既送終之無憾  
在追遠以宜寬臣限以職守所拘不獲躬詣闕庭臣無  
任云云

同前

歷主來歸即講九虞之祭椒塗永闕遂參諸后之游悲  
動紫宸禮嚴清廟中謝恭惟誠通幽顯道法祖宗問寢  
承顏事母昔同於事地慎終追遠寧親今至於寧神雖  
云曩制之遵時乃明王之孝闕宮有恤已聞升祔於姜  
源南面何為願節哀恫於虞舜

賀冬至表

紹興三十年

歷紀清臺甫驗周正之應人安化國共欣堯日之長惟

時神聖之君坐獲天人之助

中賀

恭惟德參覆載明並

照臨道方慶於陽來福自隨於剛長不假會八能之士  
和氣已充無煩觀五色之雲豐年可卜臣幸逢至景阻  
望威顏但同江表之民遙致華封之祝

賀郊禮表

紹興二十八年

萬乘造驅臨竹宮而齋祓一陽來復舉柴燎以精禋熙  
事告成綿區賴慶中賀臣伏以百神咸秩雖歷代之通  
規三歲親祠寔本朝之定制既嚴恭之曲盡亦疏數之

適宜自非明德之馨孰脩聖人之饗恭惟道膺多助運  
際中興天為蓋而地為輿爰講合祛之禮祖有功而宗  
有德聿遵並侑之文邁豆靜嘉璧琮華潤既神靈之底  
豫宜華夏之同歡臣耳屬上儀身縻近甸漢壇八陛莫  
陪績佩之趨舜樂九成徒夢鈞天之奏

同前

稽國舊章修時大祀神靈底豫華夏騰歡中賀臣伏以  
天施地生非合祭無以答兩儀之貺祖功宗德非陟配

無以揚列聖之休厥際昌辰乃成熙事恭惟禮隆報本  
孝極奉先乘至景於一陽講親祠於三歲歷太宮而裸  
鬯即吉凶以欽柴峨峨奉璋來顯相之多士洋洋盈耳  
備克諧之八音恍雲車風馬之臨燦壁月珠星之應一  
人有慶萬福來同臣身也滯南心焉拱北從甘泉之法  
駕莫預駿奔受宣室之神釐徒勤注想

謝郊赦表

竣事圓丘施恩方國絲綸一出縲紲四空

中謝

恭惟祗



紹燕謀茂昭鴻化仁同覆載每去殺而好生法若江河  
常易避而難犯尚虞黔首或麗丹書饗帝于郊俾緝熙  
于純嘏配天其澤用敷錫於庶民仰瞻貫索之星沉俯  
驗園扉之草茂臣敢不勤宣漢詔徧諭周邦二千石之  
惟良雖有慚於共理四十年之不式幸永覲於措刑

同前

輦回泰時慶熙事之備成幄次端闈錫湛恩之汪濊星馳紫  
詔冰釋晝冠中謝恭惟禮重宗祈德隆不冒除漢家之祕祝

惟欲惠民監周室之祥刑每思慎罰茲修三靈之况盡捐五  
過之疵轉和氣於春臺躋嘉師於壽域臣遠持龍節莫望鷄  
竿神祇祖考之咸安久知舜孝輝翟胞閭之有畀願廣堯仁

天中節賀表

紹興二十八年

帝立子以生商時適中於九夏民同心而戴舜節共紀  
於千秋中賀恭惟剛健乘乾聰明稽古平徭薄賦散和  
氣於豐年耀德銷兵躋嘉師於壽域眷此長羸之月薰  
然長育之風喜動東朝尚記日符之夢懽均北道有來

星使之車既深恩不冒於華戎宜善頌悉祈於富壽天心所鑒人欲必從臣濫綴從班欣逢聖旦方千里者九適備數於藩維呼萬歲者三第馳誠於軒陛

同前

日形漢夢紀誕節於九重風入舜絃扇歡聲於萬國

中賀

恭惟乾坤合德歷數在躬儉勤遠法於祖宗慈愛兼懷於夷夏人之所助天且弗違福祿延洪永御赫赫炎炎之祚本支蕃衍更觀振振蟄蟄之祥臣名在周行身遙

魏闕制三十年之國用方儲細柳之糧上千萬歲之壽  
觴徒想猗蘭之會

同前

代繼領

蒼龍正于南方適當盛夏紫電飛於北斗丕顯昌期慶  
屬當陽歡均率土

中賀

恭惟穆清居位濟哲在躬以安

平之世而益務持盈以富足之秋而常思寶儉爰應朱  
明之序系隆火德之基八千歲之春秋方衍無疆之算  
數百所之符瑞更儲有羨之休臣分職近畿馳心廣陞

作誕聖繼天之樂竊自愧于唐臣歌阜財解慍之風第  
欣逢于舜日

同前

天生民而立之君茂啓中興之運臣歸美以報其上共  
忻載夙之期

中賀

恭惟配德乾坤合明日月御赫赫炎

炎之祚成巍巍蕩蕩之功當樞電之呈祥舉華戎而賴  
慶嚴恭寅畏而自度已廸哲于四人虛靜恬澹而無為  
方成純於萬歲臣猥司外閫阻造近班使壽使富而多

男願上堯封之祝宜民宜人而受祿載賡周雅之章

謝御製書損齋記表

紹興二十九年  
代江東帥司

君子懲忿窒慾寓妙理於齋居聖人肆筆成書錫宸章  
于蕃服望雲天而祇拜偕民吏以榮觀

中謝

臣伏以自

昔守成之君鮮知持滿之戒雕墻峻宇第營桂館以求  
仙繪句締章或侈栢梁而流詠既不聞于修德自有愧  
於作猷豈如上聖之資懋啓中興之運念宴遊之不怠  
有感於斯惟筆硯之未忘式稽于訓乃闢殿廡之側益

窮聖學之高究六十四卦之盈虛獨取名於抑損述二  
百餘言之謨訓思坐鑒於興衰爛奎壁之光輝得乾坤  
之簡易恭惟皇帝陛下道包衆甫德冠百王克勤於邦  
而克儉於家罔遊於逸而罔淫於樂爰以躬行之美刑  
諸心畫之精命自郵傳人皆草偃臣敢不仰遵彛教俯  
迪羣黎煥乎文章既睹神馬圖書之秘注其耳目共化  
羔羊節儉之風

同前

代方總領

超然燕處損又損以標名倬彼雲章休勿休而示訓啓

寶函而拜賜拭凡目以知榮

中謝

臣伏以真宗著清景

之題必言省費仁祖述危竿之諭蓋慎居高是皆重熙  
累洽之時不廢履薄臨深之戒於皇上聖克紹先猷知  
盈滿之當持念宴游之不急乃闢殿廡之邃載摛睿藻

之華探伏犧西伯之用心既窮大象監武帝明皇之失  
策用作元龜乃如八法之通神尤見一人之能事恭惟  
簡易合乎天地儉勤御於家邦蕩蕩巍巍已底日新之



盛兢兢業業不忘夕惕之思雖精微自得於宸心而播告未周於邦域用饒樂石徧錫官聯臣敢不三復聖人之言載殫愚者之慮朝夕清燕以自警既存乎辭損益盈虛與偕行願事斯語

同前代吳潛

殿廬闢室揭先難後易之名睿藻摛詞述據舊鑒新之旨刻堅珉於天上錫副墨於人間中謝臣聞山不自高乃成九仞澤惟善下斯會衆流因二象之能謙畫六爻

而為損仲尼讀易深虞持滿而自賢陸贄抗言力論裕  
人而約己未有據域中之大寶立天下之廣居即蝸蝓  
蠖濩之宮制為璇榜著潔靜精微之語親御寶跽究日  
月之虧盈體乾坤之簡易內頌百執外及多方聖謨雲  
漢之昭回妙墨龍驚之蟠翥恭惟持盈有道守位惟仁  
以清心寡欲為先以黷武窮兵為戒捨宮寢而即大庭  
之館得黃帝之齋心衣弋綈而罷百金之臺邁漢文之  
躬儉尚慮蒞官之衆未知懲忿之方爰出宸文俾孚帝

德臣敢不服膺大訓竭節外臺韋三絕以深思誦之無  
數龜十朋而自效奉以有為

廣德軍謝上表

紹興二十六年  
代外舅

睿主有為慎求良守微臣何取誤列附庸懷印紱以知  
慙望雲天而叙感中謝伏念臣奮身孤遠逢世休明趨

事赴功嘗抱區區之志循名責實迄無赫赫之稱方謀  
三選之歸遽忝一麾之守眷言桐水密拱楓宸任德去  
刑吏識朝廷之意平徭簡賦人安田畝之生初莫布於

教條但坐糜於廩稍茲蓋伏遇乾剛用九皇質登三如  
日正中畢照百工之能否與天同大常憂一物之棄遺  
遂使至愚亦叨共理臣敢不勉圖寔効深念空餐政拙  
催科倘繼陽城之下考民無愁恨庶禪宣帝之中興

謝除直祕閣知揚州表

紹興二十九年九月

劇部觀風已冒外臺之寵通都移牧更聯中秘之華朝  
違舊治之山川夕見新封之民吏仰宣德意俯佩恩榮  
中謝伏念臣性拙以迂罷凡而近先朝賜第早被於作

成上聖掄材嘗塵於任使自終更於安陸旋退屏於閩  
陬筋力久衰幾坐消於髀肉星霜十易每竊嘆於鬢絲  
暨逢公道之宏開獲與時髦而並鶩分符樵李深慚芻  
狗之重陳換節江圻粗試鉛刀之一割方虞薄責遽奉  
詔除矧是廣陵夙稱督府北隣修睦邊城無晝閉之驚  
南畝服勤田畷有秋成之喜欲敷靜治宜擇能臣不圖  
猥擢於庸才仍復就加於美職江通一水誰云淮海之  
遙名列三山頓覺瀛洲之近叨踰甚矣報稱謂何此蓋

伏遇堯哲知人湯寬御衆察臣習於吏事故付之綏撫  
之權怜臣奮自書生故寓以清華之直龍光所被駑鈍  
奚堪臣敢不上體眷知勉殫夙夜身雖制閫莫陪東觀  
之諸儒志則勤民庶効西京之循吏

信陽軍謝上表

紹興二十九年

畿西假守僅輸乘障之勞湖外分麾復預專城之選洗  
印章而視事望旒冕以知恩中謝伏念臣瓠落凡材榆  
捨微分三紀官塗之荏苒十年幕府之棲遲浙水江圻

早安平進岷山粵嶺中事遐征備半刺於峴南列附庸  
於塞上試可乃已終更亟還偶逃虞典之黜幽荐冒漢  
庭之宣化惟義陽之偏壘乃中伯之舊封土厚人淳昔  
蓋稱於衍沃兵銷賦簡今漸復於流移豈伊庸瑣之資  
堪此撫摩之任茲蓋伏遇深仁懷遠大智燭微每求師  
帥之官尤慎邊疆之吏俯嘉勤拙俾効疲駑臣敢不悉  
力安民盡心固圉周邦咸喜雖慚吉甫之詩共理惟良  
願廣孝宣之治

謝除太府少卿表

將命江淮久塵星省疏榮觀闕驟亞月卿念委寄之不  
移知恩私之愈厚

中謝

伏念臣寒鄉晚出薄宦卑飛叨

逢額俊之秋濫綴登畿之數粵負丞于外府旋列屬於  
中臺所懼汰歸乃膺臨遣給餉坐兼于兩路空飡行及  
于再朞自量心計之非長常恐使華之不稱竊思載籍  
具有前模流馬木牛葛亮創蜀中之運輦車驪駕寇恂  
資河內之軍彼皆值于行師尚不聞于乏事矧說劍橐



弓之後無飛芻輓粟之勤第鈎考于簿書粗斡旋于金  
穀論功何有竊位則多已慚假寵於諸郎更許叅華於  
七寺中負梁鶴之刺徒驚晉馬之蕃茲蓋伏遇大智博  
臨深仁徧覆灼知能否故雖遠而不違力勸事功凡有  
長而必錄爰茂出綸之渥悉褒總賦之臣遂致下愚亦  
升少列臣敢不仰承睿眷俯竭駑才無廢前勞少助足  
食足兵之政更圖後効永肩惟忠惟孝之心

張端明謝乞致仕降第二詔不允仍赴行在奏

事表

紹興二十九年五月

需章屢貢祈必返于田廬溫詔荐頒俾趣朝於觀闕仰洪私之曲被嗟素願之靡申詞窮幾至于忘言感極惟知于

實涕

中謝

伏念臣以桑榆之暮景司管籥之重權引分馬

歸殆非一日強顏冒寵坐閱三年隕越是虞衰殘益甚矧父書之將墜在私義以何安竊慕馬遷請論先人之所次庶幾延壽追終舊事之未成用殫忱辭瘳塵淵聽敢謂俞音之閱更叨名節之嚴欲偃僂而趨則昧垂車之志將逡巡

以避又貽侯駕之誅進退不遑凌兢失措此蓋伏遇皇帝  
陛下恩深念舊禮厚馭臣謂其事奉有年早陪簪橐怜其  
餘生無幾久去軒墀既未許于歸休乃特容于入覲臣敢  
不勉承訓諭上體眷知葵藿之心儻一傾于天日龜魚之  
性即自樂於江湖豈惟不食於前言抑亦粗成於先志

漢州謝上表

紹興三十年

觀闕九重榮頒印組舟車萬里來見吏民所慚庸陋之  
資莫稱蕃宣之寄

中謝

伏念臣才不足以應務學不足

以通經自竊儒科即從吏役臨事欲殫于尺寸程能奚  
補于絲毫方伏窮簷遽塵偏壘矧德陽之奧壤為益部  
之樂郊去國雖遙望雲不隔聖主寬仁之有素惟在布  
宣朝家法令之具存第當遵奉名叨分土寔愧空飡此  
蓋伏遇大智燭微深恩被物獎擢循良之吏撫綏幽遠  
之區謂臣早奮羈單知人疾苦察臣粗更中外體上焦  
勞用錫左符俾臨右蜀敢不勸農桑以敦其本省刑罰  
以樂其生姑去職業之常尚容自勉倘論乾坤之造夫

豈能酬

汪端明遺表

陰陽之數難逃要歸有盡覆載之恩未報寧忍無言指

下地以將終望高穹而永嘆

中謝

伏念臣奮身寒遠稟

質迂愚曾微一善之瘡人誤辱兩朝之過聽六卿分職

佐銓曹版部之劇繁十國為連叨閩嶠坤維之鎮撫晚

由禁路洊領輔藩以疾求間竊真祠之三命何功受寵

聯秘殿者六年宜其福過以災生致乃神殫而氣索遂

辜洪造永謝清時伏願剛健天行光明日就萬年億載  
長承太上之顏四海九州迄覩丕平之世臣生而無益  
死亦奚為駑蹇自慚尚有埋帷之累精誠未泯豈忘填  
海之心

奏狀

天申節進銀一千五百兩奏狀二首

紹興二十八年代江

東轉運司

漢嶽呼三夙應社鳴之旦周庭旅百載修寶擊之儀前

件物剛本乾為瑞繇山溢恭輸內府庶參九牧之金願  
詔尚方助鑄千秋之鑑

盛德在火命自天申珍物為金寶難地愛言念逢辰之  
載夙宜修享上之多儀前件物瑞溢商山名參漢幣雖  
睿哲以不貪為寶豈貨賄之敢供然臣民堅請祝之誠  
假精剛而自見

奏劄

大兄奏劄

淳熙三年

臣竊見朝廷向來將福建沿海人戶舟船籍定數目分作甲乙丙三番輪流差使其當番之人前半年告報不得出外行之既久公私安堵未嘗乏事淳熙元年樞密院差黃蜚英同遂州通判再行根括立賞糾告監勒行駕伺候檢量丈尺辨驗木植之新舊雕刻帆檣置備軍器楨具拘留坐泥近下半年妨廢興販中下之家徃徃失業既得放散方且營運曾未半年忽准指揮三番併發赴平江府許浦擺泊事出倉卒州縣奉行急於星



火期限迫促而海道風波無程期追逮家屬禁繫決責誠可憐憫去冬臣在興化日忽報海寇自明州侵犯福州及本軍界帥憲司督責會合官吏束手坐視無以為計所幸福州打造到來發大舟帥司差撥兩隻令鄭輝管押延祥寨水軍乘駕下海追捕遂得敗獲當時若無此船海寇必致猖獗此皆已驗之事不可不慮兼福建地狹人稠雖無水旱歲收僅了數月之食專仰舟船往來浙廣般運米斛以補不足倘或盡行起發民間定闕

歲計臣愚欲望聖慈思患預防特降睿旨行下本路將  
已籍定船依舊分三番差使其當番人前期報告在岸  
祇備不當造次從便營運庶使瀕海有力之家自此樂  
於打造亦免見在船戶差使頻煩無以為生將來却致  
逃移或誤國事取進止

甲首狀劄

王監簿

庭珪

辭名命狀

乾道七年

伏念廷珪年踰九十塵忝科第五十四載昨於隆興初

蒙恩召對獲望清光叨改京秩除國子監主簿尋懇免  
供職乞祠歸鄉今復八年忽准乾道六年十二月二十  
六日尚書省劄子備奉聖旨名赴行在廷珪餘生何幸  
深願再瞻觀闕其如齒髮益衰兩耳重聽奔走道路實  
難勉強欲望朝廷特賜敷奏寢罷前件恩命廷珪下情  
不勝戰懼懇祈之至候指揮

吏部趙尚書

雄

論侍從隨赦加恩劄子

淳熙三

年

伏觀二月十七日赦書內一項應文武官合加恩者並

與加恩本部檢準司封令諸文武官應理七年已上若  
取旨及不磨勘者並隨赦加恩餘但給告即加稱加恩  
者功臣階勳爵邑皆是考功今應磨勘奉直至中大夫  
七年即是應理七年已上者係謂庶官奉直至中大夫  
又令五品以上應磨勘轉官者具狀擬奏即是合取旨  
者係謂大中大夫若職事官權六曹侍郎已上又令前  
執政官該磨勘依待制已上法即是不磨勘者係謂見  
任執政官其上件依司封令遇赦並合隨赦加恩又令

陞朝官因轉官應加恩者關到限次日報本選如此之類即是餘官須候給告即加事理昭然本無可疑只緣渡江以後本部不詳法意除文臣庶官奉直大夫以上武臣右武大夫刺史已上隨赦加恩外凡職事官自權六曹侍郎給諫已上至正尚書倘或階官未至大中大夫必候因事給告始加封邑則是侍從官雖至朝議中奉中大夫者反不若庶僚奉直大夫蓋侍從官自朝議至中大夫止理三年磨勘故也循襲錯謬莫甚于此兼

檢照前輩文集遇赦加恩告詞甚多如劉敞集中有樞

密直學士吏部郎中

今朝請大夫

權知開封府陳升之遇大

禮加勲邑制龍圖閣直學士右司郎中李兪加爵邑制  
并王珪文集有工部郎中知制誥王洙遇大禮加爵邑  
制又有內外待制加食邑制今並錄白在前其他王安  
石余靖等外制所載尤多足見內外侍從官止據職任  
不繫階官自合隨赦加恩於訓詞中明著行慶施惠之  
意寔為得體況見令吏院有名臣蔡延慶之子所著祖

宗官制舊典其論勳爵云熙寧後務減省故朝臣以上  
遇轉官併加勳階若待制觀察使已上方持給告令却  
以朝臣之制施之侍從可乎參考典故檢點法令愈明  
白本部欲照條施行更取朝廷指揮伏候指揮三省勘  
會文臣奉直大夫已上武臣右武大夫刺史以上並隨  
赦加恩其侍從官事體尤重自合隨赦加恩施行正月  
二十七日三省同奉聖旨依

文忠集卷八十二